

Inuusuttut innarluuteqartut ukiut pingasut tikillugit efterskolersinnaalernissaat, atuarnermilu ilinniagaqartutut allatulli atugaqarlutillu ilinniagaqarnersiuteqartalernissaat Naalakkersuisunit qulakkeerneqaqqullugu Inatsisartut aalajangiiffigisassaattut siunnersuut.
(Inatsisartunut ilaasortaq Juliane Henningsen, Inuit Ataqatigiit)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

Innarluutillit ukiut pingasut tikillugit efterskolersinnaalernissaat atuarnerminnilu ilinniagaqartutut allatulli atugaqarlutillu ilinniagaqarnersiuteqartalernissaat pillugu siunnersuutinnut Naalakkersuisut qujapput.

Naak innarluutillit atuarnissamut ilinniarnissamullu tunngaviusumik taamatulli pisinnaatitaagaluartut Naalakkersuisut nassuerutigisariaqarpaat meeqqat inuusuttullu ilaat qanittorisami Nunatsinniluunniit naleqquttunik neqerooruteqartoqartinnagu ilinniartitaanermi ajornartorsiulersinnaammata. Tamanna inunnut immikkut innarluutilinnut atuartitsinermik isumaginninnissamut sullissiveqarnikkut atugassaqartitsinnginnermik imaluunniit meeqqanut inuusuttunullu innarluutilinnut atuartitsineq pillugu immikkut piginnaasalinnik ilisimasalinnillu sulisussaqaannginnermik pissuteqarsinnaavoq. Taamaattumik meeqqanut inuusuttunullu immikkut pisariaqartitsisunut siuariarfissaarunnertaqaanngitsumik aporfissaqaanngitsumillu ilinniartitaanikkut neqeroorutitta ineriartortinneqartariaqarnera pillugu Naalakkersuisut siunnersuuteqartoq isumaqatigaat.

Taamaattumik sapinngisamik innarluutillit amerlasuut imartuumik atuartitsinermut ilinniartitsinermullu akuutinneqarnissaat ilinniartitsinitsinni anguniagaajuartariaqarpoq. Tamanna ilaatigut atuarfinni, ilinniartitsinermullu ineqarfiini illutat atuartunik ilinniartunillu immikkut pisariaqartitsisunik pisinnaasalinnillu inoqarsinnaanngorlugit naleqqussarnerisigut pisinnaavoq.

Atuurtut efterskolernermut tapiiffigineqarsinnaanerat - aamma ukiut pingasut sinnerlugit - ullumikkut inatsisitigut periarfissaareerpoq. Tamatuma saniatigut Namminersorlutik Oqartussat atuartunut 18-it sinnerlugit ukiulinnut tapiissuteqarsinnaareerput, efterskole 18-it sinnerlugit ukiulinnik atuortoqarsinnaagaangat. Efterskolernermut tapiiffigitinnissamut piumasaqaatit Danmarkimi efterskolimiinnermut tapiissuteqartarneq pillugu Namminersorlutik Oqartussat nalunaarutaanni nr. 14-imi, 3. september 2009-meersumi § 1, imm. 2-mi nassuiarneqartut, paragrafimi tassani imm. 3-mi allassimasutut sanioqqunneqarsinnaareerput, tamannalu efterskole atuartumik tiguisinnaagaangat ullumikkut pisarpoq.

Tassunga atatillugu Nunatta Aallartitaqarfiani isumaginninnermut immikkoortortaq ilisimatitsivoq innarluutillit efterskolertut ikittuinnaat ullumikkut Danmarkimi ukiut aappassaa pingajussaluunniit najugaqartut, innarluutillit pillugit inatsit naapertorlugu tapiiffigeqqinneqarlutik. Innarluutillit pillugit inatsit naapertorlugu tapiissutit taakku kommuninit aqunneqartut innarluuteqarneq pissutigalugu, soorlu inummumut ikiorsiissutinik aaqquussinnermut, ingiaqateqarluni

angallassinnermut, angajoqqaarsiani akuerisaasuni assigisaanilu oqilisaassinnermut aningaasartuutaanerusunut tapiissutigineqarsinnaapput.

Ullumikkut taamaallaat inuusuttut ilinniarfiini piginnaasaqalerfiusuni akuerisaasuni atuartunut ilinniartunulluunniit, kiisalu inuussutissarsiutinut ilinniartitaanernut aamma ilinniartitaanernut akunnattumik sivisussusilinnut ingerlaqqiffiusunullu ilinniagaqarnersiutisiaqartitsisoqartarpoq. efterskolerneq ilinniagaqavinnerunngilaq taamaattumillu efterskolertut maanna ilinniagaqarnersiutit pillugit malittarisassani pineqaratik. Tamatuma saniatigut efterskolerneq atuartunut atuartussaataasunut neqeroorutaavoq – imaluunniit atuartussaataanermut nangitsissutitut toqqarneqarsinnaasoq, aaqqissuussineq angajoqqaatut oqartussaassuseqartup piumassutsiminik toqqarsinnaasaa, ass. atuarfimmi kommunimiluunniit nalinginnaasumik atuartitsinnermut taarsiullugu.

Taamaattumik siunnersuutip akuerineqannginnissaa Naalakkersuisut inassutigaat, taamaattorli atuartut innarluutillit aningaasaqarnikkut immikkut pisariaqartitsinerisa malinneqarnissaannut periarfissat misissorusullugit, assersuutigalugu efterskolernernut assigiinngitsunut tapiissutinut assigiinngiaartumik akeqartitsilernikkut. Efterskolernermut tapiissutinut akigititat aningaasanut inatsisikkut malittarisassaqartinneqarput taamaattumillu efterskolertunut tapiissutit pillugit inatsisit allanngortinneqartariaqassanatik.